



O LE SULU SAMOA

EKALESIA FAAPOTOPOTOGA KERISIANO SAMOA

O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IULAI 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

FONO KMTA I LUGA O UPEGA TAFAILAGI



Tua: Amuia Seuala FT(ItuoTane), Siolo Tauati FT(Apia), Leaso Tupa'i FT(F-agá), Asotasi Time FT(ApiaSasa'e), Ailepata Leuta FT(Aana), Fili Matalavea FT(Malua) Luma:Iosefa Uilelea FT(LLA), Tunumoso S.Iosia FT(FSS), Tavita Anesone FT(Faleata)

MAOTA APITAGA FOU EFKS I FAASALELEAGA



FAIA'OGAMALUA

mai le itu agavale:
Filemoni Crawley FS
Apela Ah Him FS
Dr. Taipisia Leilua FS
Dr. Samasoni Moleli FS
Tutoatasi Toalima FS

O susuga i Faifeau Faiaoga Malua nei o loo nafa ma le Aoga Tusi Paia a le EFKS mo sui i Salafai. O lo latou maota lenei e api ai na fausia e le Mata g a l u e g a Faasaleleaga.

FAASINO UPU

1.	LAUGA	2
2.	UMUSA MAOTAAPITAGA	4
3.	EFKS SAMATAI TAI	5
4.	EFKS MANASE	5
5.	KOVITI-19	6
6.	EFKS SASINA	10
7.	NAO AFIOGAE TULEI	11
8.	EFKS TULAELE	13
9.	KMTAI LUGAO UPEGA	14
10.	O E UAFAI I LAGI	15

O LE LAUGA

Tusi Faitau: Numera 22:15-30

Matua: Numera 22: “¹⁶Ou te aioi atu ia te oe, ‘aua nei taofia oe, a ia e maliu mai lava ia te a’u; ¹⁷auā ou te matuā faamalualiiina oe; o lenei, se’i e maliu mai lava, ia e fetu’uina lenei nuu mo a’u.”

Manatu Autu: Oi se faamolemole (IBRA 20/7/20)

O le ‘faamolemole’ o le gagana e ufita’i ai mana’oga, asamoga, toma’aga ma aisiga. E pei o le faaooololoma’au, aioi faatauanau a le tupu o Palako i le perofeta taulaitu o Palaamo, ina ia alu atu i Moapi, na te fetu’u ai le nuu o Israuelu. Na alu le ulua’i sāvali e lē mafai Palaamo, ona e fesili atu i le Atua, ae tali mai o Ia e leai, ‘aua le alu i Moapi, ‘aua foi le fetuu ia Israuelu, o le nuu ua Ia tusi aao i ai e fai mona, ua latou osi le feagaiga ua uma ona Ia faamanuia i ai. E te’ena e le Atua le talosaga, e ui ina malolosi ma tele faamolemole. A o lea ua toe alu le sāvali lona lua, ua toatele atu le aofa’i o tamalii ma failauga Moapi, ua sili atu le mamalu o faipule ua auina atu; ua ‘ave foi tupe e tele e faatosina ai le perofeta, a o le tali lava e tasi, e leai. O le malosi o le tupe ma faatosina na i’u ai ina faanofoa le asini a Palaamo, ua o faatasi ma le sāvali a Moapi, na tupu ai le toasā o le Atua. Na auina mai Lana agelu e taofi Palaamo, na iloa e le asini le agelu ma lana pelu, ae punitia i mata o le

perofeta. Na faagaganaina le asini ma tautala mai, e fa’ailoa le finagalo te’ena e le Atua o le mea o mana’o atu ai le tagata. E lē o mana’oga uma e talia mai e le Atua, ae maise mana’o e fete’ena’i ma Lona finagalo. Mana’o e faavae i lagona faatiapolo, ma faatinoina i tu faapaupau ma aga le Kerisiano pei o nisi nei: (i) O taupulega faalilolilo i faiga faapaaga ina ia mailei ma faaleaga ai le tagata amiontonu. Ua faapogai Palako i le pa’aga ma Palaamo e taupule le malaia o Israuelu. E manatua ai le mea na fai e uso o Iosefa ia te ia - na latou taupule lafo i le lua, faatau atu o se pologa, ae na toe ifo mulimuli lava i ai. E leai se taupulega leaga e i’u lelei; pe taunuu foi ae le umi, aua e pei ona galue o Ia mo Israuelu, e faapea foi ona galue o Ia i mea uma mo le manuia o e alolofa ia te Ia (Roma 8:28). O le ulua’i Salamo o loo faasaina ai nei tu faatiapolo pei o le taupulepule ma taulamalama, ina ia tuu ia faamolemole.

(ii) O le fa’aaogaina o le pule ma le paoa faa-Palako e faatonuina ai le puapuaga o tagata o le Atua. Faapea le so’ona fa’aaoga lē tatau o le tamaoaiga faitele i auala pi’opi’o, pei ona ‘ave se vaega tele o le Tala o le Tupe a Moapi e faatosina ai Palaamo, ina ia faasatauro lava Israuelu. E tele atina’e lelei e ao ona fa’aluu ai tupe ma oloa, ae maise le faaleleia o le soifua lautele o tagatanuu, nai lo le faamalieina ai o le tu’inanau leaga o se tagata toatasi. (iii) O le soona fa’aaoga o tagata i auala leaga, pei ona auina ai o alii ma faipule taualoa o Moapi i le savali ia Palaamo. Atonu e manatu o le auaunaga a tagata e tautua lo latou tupu, ae o le ta’ita’i alofa moni na te faamuamua le saogalemu o ona tagata nai lo sona mana’o. E mautinoa foi o nei tagata uma e auauna ma usita’i ona o le fefe i le sala ot, ae le ona o se lotonuu pe alofa moni. Faamolemole e te’ena e le Atua lea ituaiga auaunaga pe afai o e faia nei. (iv) E te’ena e le Atua le fetu’u pe faamalaia; o faailoga o le feitaga’i, felamata’i, taui ma sui, o le ita faamoemoe, faailoga tagata, faailoga lotu. E lē o le fetuu a o le faamagalo, e le o le faatō ma faamalaia, ae o le faamanuia. O le a’oa’oga lea a lo tatou Alii o Iesu i lo tatou va nonofo ai ma isi tagata, e oo i e ita mai ma agaleaga mai - ia faamagalo ae ‘aua le fetuu, ia

faamanuia ae ‘aua le faamalaia, ia faalelei ma i latou, ma tatou ola faatasi ai i se soifuaga fealofani i se lalolagi filemu. O le fefe o Palako ma lona popole ne’i faaumatia lona malo, na mana’o ai e fetu’u Israelu. E lē o le fofō lea o le atuatuvale ma le fefe, le uia o tu ma aga faatiapolo pei o le fetuu. Auā e lē te’ā ese ai se fefe ae na o le faatupu atili o le tiga ma le leai o se filemu. Ua maitauina le mau feeseseaiga ua tula’i mai i nei aso i soo se itu o le lalolagi - amata mai le va o malo, va o talitonuga faatapuaiga, i le va o lanu, e oo i le lotoifale o aiga ma Ekalesia. Ua leai se nofo filemu ona o le malosi o le feitaga’i ma le taui ma sui, e tau le pua ma lafo, e maitau utupoto i mata o le fefaaamasinoa’i poo ai e sa’o, e taui le nifo ma le mata e faapaleni. Oi se faamolemole. O lo tatou tiute o le faamagalo, faamanuia, ma tuu i le Atua i tatalo ma anapogi, o loo ia te Ia le taui ma sui, o ia te Ia le faamasinoga tonu, o ia te Ia foi le faaolataga.

Na amata le mana’o o Palako e fetuu Israelu ona o le fefe; ae na faateteleina i le lotoleaga, ina ua faalogo o Israelu o le nuu ua tofia faapitoa ma faamanuia i ai le Atua. Lea la e fiu lava o ia i le ma’ema’e o lona sauā, o lona matamataita ma sona lotovale, ae o le mea faigata le ‘a’au i le tafe mai o le au - le faasagatau i fuafuaga a le Atua, o le a’ā i tui, pei o le sauā o Saulo i lona mapugatama’i e faamata’u ma fia fasioti i le au soo o Keriso (Galu.9:1-9). O se lape o tupu pea i le soifuaga, le loto vale pe a tofia ma faamanuiaina le isi. Ona taumafai lava lea e faufau togafiti ma tatao mailei e faaumatia ai. Leai faamolemole. E mana’omia lo tatou lagolago, e faamalosi’au i e ua tofia. Auā o fuafuaga a le Atua e lē faapito, e tofi le tagata e toatasi, ae o le faamoemoe e galue o ia mo le manuia o tagata uma. Ille isi itu, ‘aua le faasausili pe faualuga pe a tofia, ‘aua foi le fa’aaogā faapito tofiga ua aumai, auā e lē faigatā i le Atua ona faalēaogā le tasi, ae sui se isi ma fa’aaogā soo se mea, o tagata, o agelu e oo i asini, e faagagana ma fa’aaogā e le Atua e faia ana feau ma faataunu lona finagalo.

La silafia e oe Moapi, o le filifilia o Israelu o le faamoemoe ia manuia ai le lalolagi atoa aofia ai ma oe. Auā e oo i ona aso e tatau ai, ona tupu mai ai lea

o le tatupu, o le pogai i le nuu naumati, o le Alo faasino ia Tavita, o le a’ā e tupuga mai ia Aperaamo. O le Mesia o Israuelu a o le Keriso i le Au Kerisiano ua faasuafa ia Iesu; e tasi le faamoemoe na tofia ai, ia maliu e tau’ave o tatou tiga ma tauave o tatou faanoanoa. Na afio mai ia manu’ā, ia momomo, e faaola le lalolagi agasala. O i tatou uma e faatuatua ia te Ia, ua avea i tatou ma Israuelu fou, o le Ekalesia ua filifilia pei ona fai mai le apostolo o Peteru, “*A o outou o le tupulaga ua filifilia outou, o tupu ma ositaulaga, o le nuu paia, ma le nuu na faatauina mai e le Atua.*” O le Atua lava lea ma le alofa e tasi na Ia alofa ai i le fanauga a sa Iuta, na lē mafai ai e Palako ona fetuu, lea foi ua na alofagia ai i tatou, ma ua lē mafai ai e soo se mea, ona faaleaga mai. Pei ona fai mai Saulo liu apostolo, “*O ai se faasagatau mai? O ai se na te molia le au filifilia a le Atua? O ai se na te faate’aeleina mai i tatou i le alofa o Keriso? E leai se tasi, e lē mafai e se mea e tasi..*”

E i ai le talitonuga o le mana’o ga o le lalolagi o loo laualuga i lenei taimi, o le faatoga mamate i le Atua, a tusa ma lona finagalo alofa, faamolemole ia lavea’i le fanau a tagata mai le faama’i oti o le Koviti-19. Ia vave mai le aso e tineia ai lona mata’utia, ia lavea’i itutino uma o le EFKS i le nofo a Matagaluega, ma ia ‘aua le oo mai i laufanua o le atunu pele o Samoa. Ia tatou loto tetele ma faatuatua, faamoemoe ma faalagolago i Le ana le pule aoao, le mana ma le malosi uma lava, e tumu i le alofa ma le alofa mutimutivale. O Ia o loo faavae ai lou malo, o Ia le Ao o lau Ekalesia, na te le tuulafoa’i i tatou. O le tatalo faai’u a Iesu na Ia faapea atu ai, “*Lo’u Tama e, o lo’u loto lenei ia te i latou ua e foaiina mai ia te a’u, ina ia latou faatasi ma a’u i le mea ou te i ai, ina ia latou vaaia lo’u mamalu na e foa’iina mai ia te a’u; aua ua e alofa mai ia te a’u a o le’i faavaeina le lalolagi.*” O le a se mana’oga sili o i ai i lenei taimi o lou soifua faatuatua, le soifua tapua’i auauna ma fai taulaga i le Atua? A e a le faatinoina o taleni ma tiute ua foa’iina mai e le Atua e atia’e ai lou lalolagi ma ou tuaoi? Amene.
FSulu(e sui ai le Lauga tofia o le masina)

UMUSĀ MAOTA FOU APITAGA FAIA'OGA MTC I SALELOLOGA

O le afioga Taitaifono Komiti Au Toeaina/Komiti o Malua, susuga Tavita Anesone FT na ta'ita'i le sauniga i le Aso Faraile 17 Julai 2020, na faapaia ai le Maota mo apitaga o Faiaoga Kolisi Faafafeau Malua, e autovaa i Salafai e faatino le Aoga Tusi Paia. O ia foi na faiatua i le Tusi Paia ma Lauga, a o le afioga Sui Taitaifono Fono Tele/Failautusi Komiti Au Toeaina, susuga Iosefa Uilelea FT na saunia talosaga. O lenei galuega na ofoina, faatupe ma fausia e le Matagaluega Faasaleleaga. O le susuga Leaso Tupai FT, KMTA Faasaleleaga, na saunoa e tusa o lenei ofo a le Matagaluega. Na muamua ona ia tauaaao atu le 49 Pine mo Penisione, o se tasi foi o ofo a le Matagaluega Faasaleleaga, na saunia ina ua logo atu ua itiiti pine o totoe. E 50 le aofai o Pine e tusa le tau ma le NZ\$2,500, ua fa'aaoga le tasi mo le Faifeau Penisione a le Matagaluega i lenei tausaga, susuga Siaosi Leleimalefaga FS & Perelini. Ona saunoa lea o le Toeaina Tupa'i i le afuaga o lenei galuega, ina ua talosaga le alii pule o Malua mo se fale e api ai faia'oga, ma lavea'iina ai le solia faamanuvale e i latou o le maota o le alii pule o le Aoga Matata Eseese EFKS. O le Tofiga a le Matagaluega ia Fepuari 2020 na pasia ai le faia e le Matagaluega o le maota mo le EFKS ina ia fa'aaogā e le gata mo faiaoga Malua, ae faapea foi faamoemoe o le Ekalesia Aoao e folau atu ai i Salafai. O le Komiti tofia mo le galuega e aofia ai le Failautusi Matagaluega (Simalu Kovati FS), o Failautusi o Pulega taitasi, e taitaifono ai le afioga Tiakono Toeaina o le Matagaluega. Sa tolopō le galuega ona o le gasegase o le Failautusi Matagaluega faapea aafiaga o le Faama'i Koviti-19. A o le sauniga Penisione susuga Siaosi Leleimalefaga (Aso Sa 17 Me 2020) na toe feiloai ai Toeaina o le Matagaluega ma fai ai le fautuaga ina ia amata loa le galuega. Na faai'u le saunoaga a le Toeaina i le faafetaia o le Komiti, le afioga Agaiotupu Misa Lauama Tauiliili ma le Aiga Salemalama, le tapuaiga a uso Itu o Tane ma le Ekalesia Aoao. O Epati Amosa FS (ua sui ia Simalu Kovati FS) na saunoa i le Tala o le Galuega.

Tupe na maua: Amata i le Toomaga = \$50,000
Saofaga a Pulega e 4 maua ai le aofai = \$87,000
Tupe na maua mai Asiga - Malua \$5,000, Meana'i palapala malo & \$3,300, Pule & Aoga Tech EFKS \$630, Tiakono Toeaina \$1,000, Simalu Kovati FS \$500, Matagaluega Itu o Tane \$10,000 maua ai le aofa'i tupe mai Asiga \$20,430. O tupulaga a le Matagaluega na fesoasoani \$20,000. O le aofaiga atoa o le tupe na faia ai le galuega e = **\$177,430.00**
O lona Fa'aaogaina: Blue Bird Savaii = \$64,677.50, SMI = \$29,365.95, Faatauga i Apia = \$7,910, Isi Paleoloa Laiti/Saina = \$2,260, Falealuga = \$5,000, Pasese Agaiotupu vайасо taitasi = \$4,000, Mo Asiga = \$5,800, Isi faatauga(misc) = \$8,313.55.
Aofaiga o Tupe Fa'aalu i le Galuega = **\$127,325.55**.
O le fesoasoani a Vaaelua S Samau & Evaeva - o Piliki uma o le maota, asuemu tanu ai le faavae, fa'aaogaina o loli ma masini aunoa se tau. O le fetalaiga a Ulu Iakopo, o le tu'ua o le afioaga i Tafua, na ofoina fua mai le oneone ma le asuemu. O le Mafutaga Tina Mtg Faasaleleaga na latou faatotogaina le maota i ona meafale eseese o lona tau tusa ma le \$20,000. Na ta'ua foi ma le faafetai le fesoasoani tele a le susuga Failautusi Aoao i fesootaiga ma faleoloa na taugofie ai oloa.
Na saunoa le afioga Taitaifono Fono Tele e fai ma sui o le Ekalesia Aoao e faafetaia le Matagaluega Faasaleleaga, ona o lenei ma'au tele ua faia mo le Ekalesia. E le gata mo Pine o Penisione, ae sili mo le Maota o Apitaga ua faapaia i lenei aso. Malo faafetai tautua Ekalesia, malo faatuatua i le Alii Faaola le Ao o le Ekalesia, le Atua o tatou tapuai i ai. O le maota nei ua fai ma mea totino a le EFKS, a o lona vaaia ma le toe faaleleia, o le tiute lea e nafa pea ma le Mtg Faasaleleaga. Tau ina ia aoga lenei tautiga mo Malua ma le EFKS. Ona tauaaao lea o le meaalofa \$5,000 a le Ekalesia Aoao mo le Matagaluega Faasaleleaga faatasi ma faamanuiaga a le Ekalesia. O le faletua o le Alii Pule o Malua, Lalokava M. Lima na ia ooti le lipine e faailoga ai le tatalaina, ona tauaaao lea e le afioga i le Matauaofaiva o Ki o le maota i le susuga KMTA Faasaleleaga. Na tatala ona faitoto'a ma ulufale le mamalu o le faapotopotoga Kerisiano e maimoa, asiasi ma molimau i le matagofie o faivalofilima o le Matauaofaiva ma le Falefa o le Aiga Salemalama. Sa faapea foi ona taualuga i talisuaga mamafa ma fa'aaloaloga faaleaganuu masani, aua le paia o le Laulau o le Fono Tele, le KAT, Pule o Malua, le Aufaigaluega ma le mamalu o le Ekalesia sa auai. Malo le tautua Ekalesia.

FAAPAIA MALUMALU EFKS SAMATA I TAI

O le Aso Sa 14 Iuni 2020 na faapaiaina ai le Malumalu o le EFKS Samata i Tai, o galulue ai le susuga Aokuso Taumate ma le faletua o Tofaifaalua. O le faletua ia Susana T.S. Iosia na ia ooti le lipine e tatala aloaia ai le galuega ma ulufale atu le mamalu sa auai mo le sauniga, lea na ta'ita'iina e le susuga Faasavala Leilua FT o le Toeaina o le Pulega Salega i le Matagaluega Faasaleleaga. Na ia taliaina ki o le malumalu mai le Afioga i le Agaiotupu, le afioga Vaaelua Sene Samau o le Konekarate a le Evaeva sa nafa ma le galuega. Na muamua faafeiloa'i le potopotoga e le afioga Toomata Tua AF, ona amata lea o le tapuaiga, o ona pese ma viiga na lagiina lava e le Aufaipese a le EFKS Samata i tai. O le susuga Epati Sooula FS (Fagafau) na faitauina le Tusi Paia, o talosaga sa taitai e le susuga Pulemau Seve FS (Foailalo) le Failautusi o le Pulega Salega, a o le lauga na saunia e le susuga Apelu Semu FS (Fogatuli). O le Tala o le Galuega na saunoa i ai le afioga Toomata Aki Tuipe'a, o le Faipule foi o le Itumalo. 2017- amata ai ona fuafua le galuega ma fai lafoga i le loto fuatiaifo mo lenei faamoemoe.

2018 - fai sailiga tupe fai faatasi e ala i Tausala @ \$1,000+ ma saili foi i mafutaga a alo ma fanau a le Ekalesia ma le afioaga i atunuui fafo.

2019 - fai le su'esu'ega a le inisinia Peseta Konelio Tone, o lelei le fola ma puipui, vagana le vaega i luga o le malumalu tuai ua faaletonu ma vaivai. Ua taunuui mai le \$200,000 mai alo ma fanau i fafo, ona saili lea ma filifilia le Konekarate a Evaeva. E \$114,245 le tupe mai Aukilani, lafoga ma tausala maua ai le \$117,211, tupe mai Ueligitone e \$55,000, o isi fesoasoani na tuuina i le susuga Faafeagaiga e \$78,350. E \$72,116 na maua mai le sauniga o le talaina i lalo o le malumalu tuai, o le faamanatuina o le 50 tausaga o le lotu, ma isi ala o meaalofa; o le tupe atoa na maua i auala eseese e \$486,963. E \$450,000 le tau atoa o le galuega ua mae'a ona totogi. E tele meaalofa mo le faatotogaina o le malumalu na tauaaoina e aiga o le Ekalesia, o le Pulelaa na saunia e le susuga Faafeagaiga ma le aiga. Na saunoa le afioga Taitaifono Fono Tele e faafetaia le galuega tele ua faia mo le Atua, ma tauaaoina ai le meaalofa \$20,000 a le Ekalesia Aoao. Ona taualuga lea i le Talisuaga Paia na ta'ita'i e le Toeaina Faasavala Leilua FT. Malo le faatuatua, malo le faatoatoa.

FAAPAIA MALUMALU EFKS MANASE

O le Aso Toonai 27 Iuni 2020 na faia ai le sauniga e faapa'ia ai le Malumalu o le EFKS Manase, i le Pulega Gagaifomauga, Matagaluega Itu o Tane. Na muamua ooti le Lipine e le afioga i le Faletua o le Taitaifono Fono Tele, Susana Tunumoso Iosia. Ona tauaaoina lea o ki o le malumalu e le afioga Matuaofaiva, Vaaelua Sene Samau TT (Evaeva Construction) ma taliaina e le susuga Tanielu Apineru FT, le Toeaina o le Pulega o ia foi le Taitai o le Sauniga. Ona ulufale lea o le mamalu faaEkalesia, faalemalu ma le atunuui. O le Tusi Paia na faitauina e Anthony Kosena FS (Paia), o talosaga na saunia e Vavae Maua FS (Samauga) a o le lauga na saunia e Alesana Afamasaga FS (Lefagaoalii). O le susuga ia Filipo Vili FS le faafeagaiga taulagi a le Ekalesia na ia saunoa i le Tala o le Galuega. Na iloa lava talu ona amata la la'ua galuega ma le faletua ia Vaialisi, le tatau ona faalelei le Malumalu tuai. O lea foi le faatofalaiga a le au matutua, tasi le faautaga e laga le galuega. O le afioga ia Maupo Lua na ia tusia le ata o le Falesa, a o le Konekarate a le Evaeva na fausia. O sailiga tupe eseese na faia e le Faafeagaiga ma le Aulotu, o le fesoasoani mai o Aiga, ma tama fanau i atunuui i fafo pei o Ausetalia, na maua ai le \$450,000 o le tau atoa o le galuega, e 2 masina 3 vайасо na faatino ai. O le lagona faafetai ma le viiga o le Atua e maualuga i le molimau a le faafeagaiga, ina ua Ia alofa seanoa e le mafai e le Ekalesia toaitiiti ona faia le galuega tele. Ia saga viia pea Lona suafa. Na saunoa le susuga Toeaina Taitaifono Fono Tele e tali fuaitau ma faaleo le viiga o le Atua, le faafetai i le Faafeagaiga ma le Ekalesia ona o le soifua faatuatua ma le ola galulue. Na ia siitia le mau a le aposetolo ia Eperu 12: 1, o le tapuaiga ua faamalieina a tua'a, o auga tama o le Ekalesia ma le afioaga, o le au faatuatua o matamata mai a o latou alo faiva i le galuega. Malo le taufetuli ma le onosai i le ala tanu, malo le vaavaai ia Iesu ua gafatia ai galuega tetele. E leai sina mataua o le soifua auauna e lilo i le silafaga paia a Le ana le galuega. Na ia faamanatu foi, ina ia fa'aaoga le malumalu ua latou tautiga aj, e fai sauniga lotu e 2 i Aso Sa. Na faafetaia foi le afioga i le Matuaofaiva mo le taleni gaosi malumalu. Ona tauaaoina lea o le meaalofa \$20,000 a le Ekalesia Aoao mo le galuega e tusa ma ana iugafono tumau. Ia tumau atu pea le viiga i le Atua e faavavau.

KOVITI-19: Ia mānava le Lalolagi

O le Sa ma le Shemita i Levitiko 25

Tusia e Ben Taufoua Laie & Brian Fiu Kolia

Faatomuaga: O le Sa

O le Aso Sa i Samoa o se aso filemu. E le tele ni leo e faalogoina i lea aso. O le pa'ō o faigā-suāvai i le vaveao. O le tatagi o logo o falesa ma le leo mālie o aufaipese o loo lagiina viiga. E oo atu i le afiafi, e na o talanoaga faasamasamanoa a o taumafa le iputi o le afiafi, o loo faalavelaveina ai le aso to'afimalie. A o malolo tagata, o loo malolo foi le laueelele ma le fogātai. E leai se faigafaiva, e leai se faigā ma'umaga, e leai lava se galuega e tasi o faia i le laueelele.

E faapei o le au Iutaia, o le faamamaluina o le aso paia e tulaga ese ai Samoa mai isi atunu. E le gata ina tulaga ese i le laeiina o lavalava papa'e, ae e matauina lava le lē tele o ni gaioga auā o loo mau pea le tagata ia i le malu o lona fale. O le mea mālie, e faapea foi le laueelele, le sami ma le lagi i le Aso Sa, e mau pea lava i o latou vaega ua uma ona faavasegaina i le foafoaga, ao malolo mai i le galueaiina e tagata. A tagai la i le siosiomaga i se Aso Sa, o se aso filemu; o le lagi, o le vai ma le sami faapea le laueelele ma laufanua, o se vaaiga matagofie o loo tino mai ai le filemu lea. Peitai, e ese le ata lea, ma mea o loo vaaia i fafo atu o Samoa, ae maise i lenei vaitau o le faamai.

A o sosolo le Koviti-19, sa i ai ni ata na tapu'eina ma tuu i luga o le YouTube e nisi o tagata pueata. O ata o nisi o nofoaga ta'uta'ua i le lalolagi, e pei o le Taj Mahal i Initia, le Eiffel Tower i Farani ma le Pa Tele i Saina, o loo tu faafeagai le vaaiga o ia mataaga i le taimi nei ma le taimi ao le'i sosolo ai le faama'i. Vagana ai le gaogaoa o auala i le leai o ni tagata feoa'i, o se mea matautia o loo iloa i ata ia, o le lanu moana matagofie ma le manino mai o le lagi i le taimi nei, ae i le taimi ao le'i pesi le faama'i, na pefua ma palapalā. O se mea na tupu fua? O foliga o le lagi i Samoa e manino ma matagofie faapea, ae ua leva lava na faapea. E le'i suia lava lona matagofie, o lea lava e tumau. O loo lanu moana lava, ma o loo manino pea.

Aisea ua faapea ai? O le tulaga o i ai nei le lalolagi, e pei o se ata o loo valiina, ma o loo ta'u mai e le ata lea se feau: ua tatau ona malolo le lalolagi. Ua tatau na tapunia uma fale, ina ia malolo le siosiomaga, se'i toe manava. Ua tatau iloa lea mea i Samoa. O le faamamaluina o le sa o se auala lea ia toe manava ai le lalolagi, ina ia lanu moana pea le lagi, ia tumau le mama o alā vai, ma ia ola lausiusi pea le laueelele.

O tagata Samoa, o tagata mātau. O le poto, o le aganuu, o le soifuaga i totonu o nuu, e faavae

lava i le vaai ma le mātau. A o lei taunu mai le Tala Lelei, sa vāai tagata Samoa i le sami, le laueelele ma le lagi, mo ni feau o loo tautatala mai ai o latou atua ia i latou. Sa vaavaai i le sami e malu ae sousou, le laueelele e lausiusi ae faigata, ma le lagi matafi ae louloua. Ma i vaaiga nei, o loo a'oa'oina ai feau o le alofa, o le faaaloalo, le fesootaiga o tagata ma le siosiomaga, atoa ai ma le tautua. O aoaoga o loo faavae ai le aganuu ma le poto faa-Samoan.

Ina ua aumai e misionare Europa le Talalelei, na tumau lava le tele o tu ma aga faa-Samoan. O nisi o vaega o le aganuu na mou atu, a o isi, pei ona fai mai Tupua Tamasese Efi, sa musumusuina ma tuataliga i augatupulaga mulimuli mai. A o le mea ofoofogia lea, o le tumau pea o tagata Samoa i lo latou aganuu.

O se tasi o vaega o le aganuu Samoa e le'i mou atu, o le faamamaluina o le sa. O le upu sa, o lona uiga o le 'pa'ia' ae e i ai foi lona uiga o le 'taofi' poo le 'vavao.' O le sa o loo faatauaina ai le mamalu o se mea i le vaaiga faa-Samoan. O loo faamamaluina vaega eseese o le olaga faa-Samoan: o sootaga (aiga ma nuu), o le va (faalenuu, faaletino, faaleagaga), o talaaga o aiga ma gafa, o suafa tāua, atoa ai ma le siosiomaga: o le fanua, le sami ma le lagi.

O le sa foi o loo faatauaina ai le mamalu o le lotu Kerisiano mo Samoa. Lea e mafua ai ona igoa ai le uluai aso o le vaiso, o le Aso Sa, auā o le aso o loo tapuai ai tagata i le Atua. O le malumalu, o le fale o loo faaogatotonu i le tele o afioaga, o loo ta'uua foi o le falesa, poo le malumalu sa. E talitonu lava, i vaega uma nei o le soifuaga i totonu o nuu ma alaalafaga, o loo faatauaina e le sa lo latou mamalu. O le sa o loo tumau ai le mamalu ma le paia o ia vaega.

I lenei vaitau o le Koviti-19, e faigofie lava ona tatou iloa le tutusa o le sa ma le tapunia o le atunu e le malo. O le tapunia o faapotopotoga ma fesootaiga, o se sa mo le atunu atoa. E fua la i le vaai a le tagata, poo fea e tutusa ai le sa ma le tapunia o le atunu. Pe manatu i le taua o le tapunia o le atunu ina ia saogalemu ona tagata ma le siosiomaga, poo le manatu i le faalavelave o le sa ua aveesea ai le saolotoga o le tagata e faatino ai ana feau.

E faapena foi ni lagona e faatupulaia e le sa. I le ma itulau lenei, o loo ma fesiligia ai le tali a lo tatou atunu i le faama'i. Poo tatou manatu i le taua o le sa e malu puipua ai tagata, poo tatou manatu i le leai o se sa'olotoga? I le ma taumafai e tali lenei fesili, e fia avatu se tali faa-Tusi Paia, ma tomanatu i le sauniga o le 'semita', o se sauniga e tutusa ma le faamamaluina o le sa, e pei ona maua i le Levitiko e 25. O le faamoemoe o le a aoga lenei talanoaga e aumaia ai se faatupu manatu, e tatou te toe tagai i le

KOVITI-19: Ia manava le Lalolagi

faamamaluina o le sa, mo la tatou tali i le faamai o le coronavirus.

Auiliiliga Faa-le-Tusi Paia ma le Faa-saienisi

O se faatonuga taua mai le Atua i le nuu o Israaelu, o le faamamaluina o le ‘tausaga faasapati’, e pei ona i ai i le Levitiko 25:2-7. O le ‘tausaga faasapati’ e mafua mai le upu Eperu o le ‘shemitah’ – o lona uiga o le ‘tatala’ (release), ma o loo faamalosia ai le malolo o le laueelele mai galuega i le tausaga lona fitu, pe a mae’ a tausaga e ono o galueaiina le fanua. E ui ina le ta’ua le upu ‘shemitah’ i le Levitiko 25, ae o loo iloa i le matapu lea le faamamaluina o le faamaloloina o le laueelele mai galuega a tagata.

O le laueelele, e tusa ai ma le faatonuga a le Atua, o se meaola pei foi le tagata. E tatau foi la ona malolo, ma toe faafouina, toe faatupuina le palapala fou ma manava mai galuega a tagata. Na faasaina e le Atua ona galue se tasi i le Aso Sapati (Esoto 20:8-11) mo lea lava mafuaaga. Talu ai la o le eleele o le meaola foi, e ono faasala foi la e le Atua le tagata pe a le tausia lelei le siosiomaga, aua pei ona taua i le Kenese 1:27-30, o i latou o tausimea o le foafoaga. Ua faatonuina Israaelu, o se nuu faifaatoaga, ina ia faatino galuega faafaatoaga mo le ono tausaga, ona malolo ai lea i le tausaga lona fitu, ina ia malolo le laueelele. O lona uiga, o le tala i le Levitiko 25:2-7, o se tala i le faatonuga a le Atua mo le faapaiaina o le laueelele o Israaelu, ae mulimuli mai i fuaiupu i tua seja oo i le mataupu e 26, se faamatalaga auiilili i le manuia mo le nuu pe a utagia le ‘shemita.’ O mataupu la e 25-26, o se valaau ia Israelu ina ia silasila i o latou fanua ma eleele o se meaola. I Samoa, e faapea foi le tatou vaai i le sami.

O le fesili: *E faapefea ona aafia le foafoaga ona o galuega a tagata i le laueelele, le ea ma le sami?* O lenei fesili o loo agai i le faatauaina o le tiute tausamea a le tagata i le foafoaga, ae le gata i lea, o se auala e toe tagai i le sese o le manatu faapea: o le Koviti-19 o se faasalaga a le Atua i tagata.

E toatele nisi o le au suesue o le Tusi Paia o loo ta’ua se fausaga-tafatolu o le ola i totonu o le Feagaiga Tuai, o loo fesootai ai vaega nei e tolu: O le Atua, o le Fanua, ma tagata. O le fanua o le meaalofa mai le Atua i tagata (aofia ai ma le sami). A o le tali a le tagata, e tatau ona faaali le agaga faafetai ma le faaaloalo e ala i le avea ma tausimea lelei o le foafoaga ma ia usita’i i faatonuga mai le Atua. A lē faamaoni la le tagata i ona tiute ia, e aafia ai le laueelele (Lev 19:29; Num 35:29-34; Teut 21:2; 24:4; 28:1-14, ma isi). I le vasa Pasefika, e aafia ai foi le sami.

E ui ina e le o faamamaluina e Kerisiano Samoa, i Samoa ma fafo atu, le “tausaga faasapati”, ae mafai ona tatou vaai i lona taua, ina ia a’oa’oina ai tagata ma faamalosiau i ai ina ia faamaoni i le tausiga o le *fanua, ea* ma le *sami*. E aoga foi e tatou te mafaufau i ai, aua e ui ina faamamalu le lalolagi le “Aso mo le Lalolagi” ia Aperila 22, ae e le o famamaluina e tagata Samoa lea aso.

I le faitau afe o soifua ua maumau ona o le Koviti-19, ua faauigaina e nisi o lotu Kerisiano i le lalolagi lenei faama’i o se faasalaga a le Atua i tagata. Ae i lenei itulau, o loo ma finau ma faapupula atu o le Koviti-19, o le mea na pogai mai le tagata, ae le o se faasalaga mai le Atua. E ao ona manatua e tagata Samoa, ina ua mae’ a ona fai e le Atua le lagi ma le lalolagi, ua ia silasila atu, “ua lelei” (Ken 1-2), ae i le Kenese 3, o Atamu ma Eva lava na fia atua, ma o i nā na ofi mai le amioleaga (poo le agasala) i le lalolagi “lelei.” O le amioleaga la, e manino lava e pogai mai le tagata. O le foafoaga a le Atua na fai ua “lelei” ma o mea e mulimuli mai e fua i le tagata. O le Koviti-19 o le valaau lea a le siosiomaga i tagata ua fia mānava. O le tele o suesuega a saienisi ma o latou lapataiga ma fautuaga mo le tineia o le Koviti-19, o loo faaaauupegaina ai i tatou mo le puipuiina o tatou tuaoi ina ne’i ulufale mai le faama’i i o tatou laueelele. O suesuega faasaienisi nei o loo faavae i suesuega a i latou o loo suesueina mafui’ e, faapea le au suesue i le siosiomaga atoa ma nisi o faamaumauga a le World Health Organization (silasila i le tusitusiga a Marina Koren: “The Pandemic is Turning the Natural World Upside Down”), ma i suesuega nei o loo iloa ai suiga i le *ea, le famua* ma le *sami*. Mai ia suesuega, o loo iloa ai se vaaiga ofoofogia i le siosiomaga i le mae’ a ai o le tele o masina ao faamamaluina le va 6-futu ma le isi tagata (social distancing). Ma o vaaiga ofoofogia la nei: ua faaititia kasa oona (nitrogen dioxide ma le carbon dioxide) i le *ea*, o loo aafia ai le soifua maloloina o tagata faapea le mafanafana o le lalolagi (global warming); ua toe tagi manu felelei; ua faaititia le pisapisao sa aafia ai foi le soifua maloloina, e pei o ma’i faalemafaufau ma le atuatuvale, o le toto mauluga, o le lē lava o le moe, ma isi; ua sa’oloto le feoa’i o i’ a o le sami i isi vaega o le kelope; ma ua faigofie ona matauina mafui’ e. O lona uiga, e mafai ona tatou faapea, o le lē suia o le matagofie ma le lanu moana o le lagi i Samoa, a o lei sosolo Koviti-19 e oo mai i le taimi nei, e le o se mea na tupu fua!

Manatu Faai’u:

A o i ai pea nisi o vavao ua faia e le malo: *o le taofia o tapuaiga; faaititia o itula faigaluega; faapuupuuina itula e tatala ai pisinisi; o le va 6 futu ma lesi tagata e faamamalu, o le taofia o faapotopotoga toatele, o le tapunia o faleaoga,*

ma isi, e talitonu o loo i ai le toatele o loo manatu e lē aogā ia vavao. E moni lava, e feteena’i vavao ma sa nei, ma le soifuaga ua masani ai tagata Samoa mai lava le amataga (e ala i faapotopotoga toatele ma le mafuta ma isi), ae ao pea ona seu silasila ma manatu i le lē lava o vailaau ma togafitiga i Samoa i Sasae ma Sisifo, ae maise ai i le taimi nei, o loo sailiili pea fomai mo se fofo.

Mai le talanoaga puupuu i le Levitiko 25 ma nisi o suesuega faasaienisi sa faatalanoaina, e manatu le au faipepa, ua talafeauga vavao ma sa ua faia e le malo, auā o le a sili ona aoga mo *le laueelele, le sami*, ma *le lagi (ea)*. O loo auai faatasi Samoa ma isi atunuū e tali atu i le faafitauli ua to’ia ai le lalolagi. Ae mo Samoa, o se avanoa e toe silasila ai i le tāua faapitoa o le sa: o se avanoa e toe mafaufau i lo tatou sootaga ma le siosiomaga. Ina ia manatu o le sa e le na o le vavao ma taofi, ae o le faamamalu ma faapaia. E tatau ona tatou manatu i le sa o se mea e iloga ai le agaga faafetai o tagata i le siosiomaga – i le mamalu o le laueelele ma le sami. E manatua ai le tala a le isi fomai o suesuega i le sami, o Michelle Fournet, ua faapea mai: “*Ua maua le avanoa e mānava ai le siosiomaga, ao taofi tatou mānava.*”

COVID-19: Letting the Earth Breathe

The Samoan *Sa* and the *Shemita* in Leviticus 25

By Ben Taufoua Laie and Brian Fiu Kolia

Introduction: The Phenomenon of *Sa*

The typical Sunday in Samoa is rather calm. Only a few sounds are ever allowed throughout the day. The sounds of umu in the early dawn. The clangour of church bells and the harmonious choral singing throughout the day. While in the afternoon, only quiet conversations over supper serve to disrupt an otherwise silent and serene day. As the people rest, the lands and the ocean also rest. There is no fishing, there is no taro planting, nor any other working of the land.

Like the Jews, this strict observance of the holy day set them apart from other nations. Not only do they wear their Sunday white, there is also hardly any movement as people are confined to their own familial spaces. Intriguingly, the land, the oceans and the skies are kept to their own spheres, taking a breather from human interaction. Looking at our surroundings on a Sunday, it is peaceful; the skies, the waters and the land depict a beautiful manifestation of tranquility. Yet this picture is somewhat different to the outside world, particularly in this pandemic.

During COVID-19, photographers and YouTubers around the world have captured amazing images and footage of some of the world’s well-known landmarks such as the Taj Mahal, the Eiffel Tower and the Great Wall of China, contrasting them to what they looked like before the coronavirus pandemic. Besides the eeriness of empty streets, what is telling is the striking beauty of the skies: blue and clear, as opposed to its polluted variety before the pandemic. But could this be coincidence? The skies in Samoa are similarly picturesque, but they have always been that way. Nothing has changed: still beautiful, still blue, still clear. Why is this? The scenes all over the world painted the picture of a universal truth: that the world was in need of respite. Everything needed to shut down, to pause so the earth could breathe again. In Samoa, we already knew this. It is this observance of *sa* that enables the earth to breathe again, to ensure the skies remain blue, that the waters maintain its pristine state and the earth regenerates in abundance.

Samoans have always been observant. Their wisdom, their customs, their lifestyle, are based on watching and learning. Prior to Christianity reaching the south seas, Samoans observed the ocean, the land and the skies, looking for clues of the gods speaking to them. The harmonious yet unforgiving nature of the seas, the fruitful yet rough essence of the land and the splendor yet cyclonic character of the skies, all revealed messages of love, respect, interconnectedness and service, forming the fabric of Samoan indigenous wisdom and folklore, otherwise known as the *fa’ā-Samoa*.

As the European missionaries brought Christianity, most tenets of the *-fa’ā-Samoa* withstood the new Christian teaching. Some elements were either eliminated, or as Tupua Tamasese Efi would say, “whispered” down to generations. The resilience of the Samoans in upholding the *fa’ā-Samoa* was most impressive.

One aspect of the Samoan culture that was maintained was the observance of *sa*. The word *sa* can mean ‘holy’ or ‘sacredness’ but it can also mean ‘forbidden.’ The *sa* therefore denoted sacredness in the Samoan worldview. It intimated sacredness in the various realms of Samoan village life: relationships (familial and the village), spaces (*va* – sociological, physical, spiritual), family history and genealogies, chiefly titles, and the environment: the land, the ocean and the heavens (*lagi*).

The *sa* also marked the sacredness of Christianity for Samoans. Sunday is appropriately named *Aso Sa*, the day of Christian worship. The temple, a

centerpiece in the Samoan village, is commonly termed the *fale sa* (lit. sacred house). Indeed, in these various spheres of village existence, the observance of *sa* maintains its integrity and congruity. Forbidding access and contact, keeps the elements holy and sacred.

In the midst of the nation's response to the coronavirus pandemic, it is hard not to draw parallels between the nation's lockdown with the *sa*. Forbidding gatherings and contact has enforced a nationwide *sa*. Depending on perspective, the parallels can range from understanding the necessity of keeping things safe and secure, to an attitude of feeling powerless and being captive, as though freedom has been revoked.

The *sa* also generates similar disparities in attitudes. In this article, we ask the question of our own response as a nation to the pandemic. Are we understanding the importance of *sa* in protecting our community, or are we perceiving the *sa* as a violation of our basic rights? In attempting to answer this question, we offer a biblical response, recounting the Jewish observance of the '*shemitah*', a custom that resonates with the observance of the *sa*, as found in Leviticus 25. It is our hope that the ensuing discussion could draw out implications for re-imagining the *sa* as a paradigm for responding to the coronavirus pandemic.

Biblical & Scientific Analyses

One important divine injunction to the Israelites to observe during biblical times is reflected in Leviticus 25:2-7, which is understood amongst biblical scholars as the "sabbath year." The 'sabbath year' is generated by '*shemitah*' – a Hebrew verb translated as *release*, which enforces a fallow seventh-year after agricultural work on the land for six years. Although the term '*shemitah*' does not appear in Leviticus 25, but the practice of *resting* the land from human labor is obvious.

Like human creatures, the land, according to the divine command, is a living entity. It needs to *rest, refresh, renew, reproduce new soil*, and to *breathe* freely from human activities. God forbade any work on the seventh day / sabbath (Ex. 20:8-11) for the very same purposes. Because land is a holy living entity, God had ordered possible sanctions on humanity, who according to Gen. 1:27-30, are the responsible caretakers of creation.

In an agrarian context, the Israelites were advised to perform agricultural work for six years then on the seventh-year they are required to leave the land to lie fallow. Thus, Leviticus 25:2-7 is an account on

divine instructions concerning the sanctification of the land of Israel, which is followed in Leviticus 25-26 by a detailed discussion of Israel's socio-economical welfare. These chapters call to the Israelites to see that their land is also a living entity. In Samoa, we would say the same about our sea.

How do human activities on land, air and ocean affect creation? The questions here go to the importance of humanity's care for creation, and more importantly, might use us to shape a response to the erroneous notion that the COVID-19 is a divine punishment on humanity.

Several biblical scholars have found a "triad-structure" to life in the Old Testament linking God, Land, and humans. Land is a divine gift to humanity (we would include the sea). In return, humanity must show appreciation and respect by becoming good stewards of creation and to observe divine instructions. If humanity fails in this vocation, it affects the land (Lev. 19:29; Num. 35:29-34; Deut. 21:2; 24:4; 28:1-14, etc.). In Oceania, we also see the effects on the sea.

Although Samoan-Christian communities, locally and abroad, do not observe the "sabbath year," we can consider the practice a pedagogical one to encourage our people to care for *land, air and ocean*. Although the world observes what is called "Earth Day" on April 22, it is not widely recognized by our people.

With the thousands of lives lost to the COVID-19, many Christian communities around the globe have interpreted the crisis to be a sign of divine wrath on humanity. This article aims to inform that the COVID-19 is a human product, not a sign of divine wrath. The Samoan communities ought to keep in mind that after God created heaven and earth, He saw, "it was good" (Gen. 1-2), whereas in Genesis 3, Adam and Eve sought to become gods themselves, which was how evil entered the "good" creation. Evil, obviously, is a human product. God's creation was made "good" and what follows will depend on humanity. The COVID-19 is mother earth's call on humanity that it needs to breathe.

From the various branches of science and their proposed precautions to fight the COVID-19, they are helpful in equipping us in preventing the deadly pandemic from entering our boarders. The scientific analyses employed here are based on findings from seismologists, ecologists, and data gathered by the World Health Organization (Marina Koren: "*The Pandemic Is Turning the Natural World Upside Down*") concerning changes in the *air, land and sea*. From the combined data, they unfold jarring effects

across the *land, ocean and air* after months of the enforced social-distancing. The data have shown less *nitrogen dioxide* in the air (affect human health) and *carbon dioxide* (cause global warming); *birds chirping freely; less noise pollution* (can negatively affect human health, e.g., stress-related ailments: high blood pressure, sleep disruption, etc.); *species in the deep sea* are finally roaming freely to other parts of the globe); and *earthquakes* are easily detected. It could be adjudged then, that the unchanged blue skies in Samoa before COVID-19 to now, is not a coincidence!

Conclusion

While Samoa is under numerous government restrictions: *church services withheld; limited working hours, limited business hours, six-feet distance, the ban on large gatherings, school closure*, etc., these might seem to be nonsense to many. Of course, the restrictions at some point conflict with the lifestyle that we the Samoan people embrace and enjoy from our beginnings (large gatherings and socializing with one another), but we must keep in mind the lack of medical supplies in both Samoa, and especially the ongoing search for a cure.

From the brief discussion on Leviticus 25 and the scientific findings provided earlier, these government restrictions are very healthy decisions for our *land, sea and air*. We are joining with the global community to respond to a global problem. But for us this is especially an opportunity to consider what *sa* really means for Samoans: an opportunity to rethink the way we relate to the earth. To remember that *sa* is not just to forbid, but to sanctify. We must therefore consider the restrictions as humanity's sign of appreciation for our environment and surroundings - the sanctity of land and sea. In the words of a known marine ecologist, Michelle Fournet "*Nature is taking a breath when the rest of us are holding ours.*"

TAUAA LUKO E LUA

O le atalii na faalolo a o faamatala e lana toeaina Le tala faatusa i le va o le lelei ma le leaga i le tauiviga O luka e lua o loo tau i totonu ia te ia i aso uma lava E finau malosi Lelei ia malo ae le tuumamaina e Leaga Fesili le atalii O ai le luko e malo i le iuga ole tauvaga? Tali le toeaina, O le manu e ma'ona lelei i lo'u fafaga Ioe, o i tatou e leoleo ma fafaga o tatou lava agaga Ia tupu, ola ma fua tele Manuia, poo le tele o Mala

TOE SAUNIGA MALUMALU TUAI EFKS SASINA, ITU O TANE

O le sauniga faapitoa e faamavae atu ai i le malumalu tuai o le EFKS Sasina, sa faia i le Aso Sa 28 Iuni 2020 taitaiina e le Faafeagaiga Panapa Too FS. O le faitauina o le Tusi Paia ma Tatalo na saunia e le aufaigaluega o Ekalesia a le afioaga. O le faasologa o malumalu o le Ekalesia na saunoa i ai le faafeagaiga faapea: (i) O le uluai fale tapua'i na fausia 1833, ina ua to'ai taunu le Tala Lelei, o le fale faa-afolau i luma o le vaieli i le fanua o le aiga sa Vailili, sa faamalama polasisi. (ii) O lona lua na fausia i le tausaga 1900, na sii ai i uta i le fanua o le aiga Sa Vaganā, ona ua amata ona aafia i le lata i le sami; o le falesā lea sa faiototo'a ma faamalama laupapa, leai se fa'alo, sima autafa ae tanu iliili totonu. (iii) O lona tolu na fausia i le 1958, a o Novema 1959 na gasegase ma malolo ai le kamuta, faapa'ia se vaega e fai ai tapuaiga se'i saili tupe e faauma ai. O le aso 18 Tesema 1969 na faapaia aloaia ai (11 tausaga talu ona fai). (iv) Aso 10 Iuni 1991 na toe faafou ai talu le afā o Ofa, ae umusā 27 Tesema 1991; o le matai tufuga o Lealofi Malo, na faatupe i le malaga i Niu Sila maua ai \$75,000. O le malumalu lea e oo mai nei, o lea o le a faamavae ma tuuina ifo i lalo. Ua tupu le aofai o le Ekalesia ma ua va-apiapi, ua faasolo foi ina lē saogalemū mo tapuaiga, o le ala lea ua a'e ai le tofa o le a tuu i lalo, ae fau se malumalu fou.

O lea sauniga na toe tolaulau ai le faasolo mai o le aufaigaluega faifeau e faapea: (i) Farani (Safotu) (ii) Fepuleai (Saleaula) (iii) Motu (Sili) (iv) Elisara (Matavai) (v) Tanielu (Safotu) (vi) Nifo (Faleasiu) (vii) Ieremia (Sasina) (viii) 1911-1935 Polutea Talitonu (ix) 1936-1939 Ario Siō (Puapua) (x) 1940 Toe amia Polutea Talitonu sa faiaoga (xi) 12/7/1941 - 1978 Ageli Samasoni & Lipine (afafine P. Talitonu) Fusi Safotulafai. 1955 Toeaina, 1956 Toeaina Faatonu, 1962 maliu Lipine, 1978 Penisione. (xii) 26/8/78 - 10/8/84 Akina Timo & Penetekoso (xiii) 29/11/85 - 17/5/89 Esau Toa (Falevao) & Faaloua (Lefagaoalii) (xiv) 1990 Panapa Fata Too & Leafa.

(Fa'aauau itulau 13)

NA O AFIOGA E TULEI MAI FOFOGA O LE ALII

E MUAMUA ONA I AI LE ATUA

(i) “²⁴*A o le’i valaau lava i latou, ou te tali atu; a o tautala mai i latou, ou te faalogo atu lava.*” (Isaia 65).

Ina ua faafuase’i ona ala Randy le tane a le tamaita’i o Wilda Lahmann i le tuneva o le po, o oomi lona fatafata ma tau mānava, na iloa e Wilda e lē lava se taimi e valaau ai ma faatali mo le taavale a le falema’i. Na ia amo lona to’alua i la la’ua taavale ma faata’oto faagaulua ai o ia i le faitoto’a, ma faatelevave atu loa i le itu aga’i i le maota gasegase. Na tusia e Wilda le lipoti: “E 15 maila le mamao i le falema’i, ma sa ou taumate le taunu manuia o la ma’ua si’iga ma’i. E ‘ave le taavale ma ou tatalo, ‘Le Alii e, faamolemole alofa auina mai se lavea’i!’ Pe tusa ma le maila talu ona ma’ua tu’ua le fale, ae ou vaai mamao atu i luga o le auala i se vaaiga ou te lē talitonu i ai, e peisea’i ua faasesē mai o’u mata ma lo’u mafaufau ia te a’u ona o le vevesi. O le taavale a le falema’i o loo tu i le auala, o ‘emo’emo mai le faailoilo, ma se alii foma’i mo faalavelave o loo tu ai i ona tafatafa. O faatali mai mo ma’ua? E faapefea ona iloa lo ma’ua faalavelave?”

“Na ou tu vaelua i le taofi, ma tamo’e saosaoa atu i ai ma tauvala’au mo se fesoasoani. Na latou amata togafiti ma faanatinati atu loa Randy i le falema’i. O le isi tolu aso na o le moe ma faatali; ou te le’i tu’ua lona moega, na o le tatalo ia ala mai o ia. Ma ina ua ala mai, na fesili poo le a le mea na tupu? O’u tali atu, ‘Sa oso malosi lou ma’i fatu. Pe ana tuai teisi mo se minute pe lua, faapenei ua e leai.’ Na fesili mai Randy, ‘Na e telefoni i le falema’i?’ ‘E leai.’ O la’u tali atu lea ma tau faamatala le mea pei se vavega na faate’ia ai a’u. ‘Fai mai na latou o mai i le valaau atu a se isi ma’i i le fetaulaiga ala lea, na latou toe siaki foi le ofisa, ma faamaonia ai o loo sa’o le nofoaga ua latou i ai. O le taimi tonu lena na ta’ua taunu ane ai.’ E sefululima maila i luga o le auala gaogao i le leva o le po. A fua i le tulaga faigata o le ma’i fatu o Randy, e lē oo i le falema’i, e lē ola pe

ana leai le taavale falema’i lea. O la’u molimau, na fetau lelei le taimi na taunu ane ai i latou ia.”

E i ai aso e tutupu ai faalavelave ogaoga ma faafitauli faafuase’i, e leai se taimi e valaau ai le faifeau poo lau paaga masani i lotu talosaga. O taimi faapea e taua ai lou silafia lelei ma faatuatua i fetaiga a le Atua, “*A o le’i valaau lava i latou, ou te tali atu; a o tautala mai i latou, ou te faalogo atu lava.*” O Ia le Foma’i, le Leoleo o loo tiute faasoloatoa 24/7 ‘O Lē faaolaina mai lou ola ai le tuugamau’, na te silafia mamao lava i luma, ae e te le’i iloa, ae le’i tupu se faalavelave.

(2) “⁴*e faia lona faamaoni māu talipupuni ma mea e puipuiina ai oe.*”(Sala.91).

Na foai ane e se tasi alii fai pisinisi i le tamaitai o Mavis Gustafson Pigford se Tusi Paia i le lomiga o le Gideon, ona ia tuu lea i totonu o lana ato ta’ita’i e le’i toe mafaufau i ai. Mulimuli ane a o ia savali i luga o le auala, na tu ane se taavale laitiiti, o le ave taavale ua faata le fana ma fai ane ia vave atu i totonu o le taavale. O lana molimau na tusia e faapea: “Na ou oso i totonu o le taavale ma le fefe ma alu loa le taavale. Na faatū le taavale i se vaivao ma taumafai le alii ave taavale e toso faamalosi a’u. Sa ou taumafai malosi e tete’e ese, ma fai ai la ma’ua tauiviga seia oo ina faatonu mai a’u ia ou alu ese i fafo ma le taavale. E le’i tu lelei o’u vae i le auala ae ou faalogoina loa le pa a le fana, ma ‘ou lagona le ma’ini o le manu’ a i lo’u itu. Na ou matapogia, ae ua taamilo mai le tagata, ave la’u atotupe ae togi mai la’u ato ta’ita’i i lo’u ulu ma toe fana mai le isi pulu, na ou faalogoina le taia i lo’u tino. Na ou toe te’i i le ola o le taavale ma alu ese, ona ou setusetu atu lea i le fale lata mai. Na valaau e se tina le taavale mo faalavelave ma ‘ave ai a’u i le falema’i, na maua le tala ua pu’e e leoleo le ave taavale amio leaga.”

“Ae le’i faia le ta’otoga e aveese ai le pulufana mai lo’u itu, na sau lo’u uso e asi mai a’u. ‘E te iloa le mea na ia lavea’iina oe mai le pulufana?’ o lana tala

NA O AFIOGA E TULEI MAI FOFOGA O LE ATUA

lea ma tuu mai ia te a'u le Tusi Paia Gideon lea na foai mai e se alii fai pisinisi. E susu'e atu totonu o le Tusi Paia, o iloga ai le mea na taia ma ati ai le pulufana, o le mata o le pulu na tu tonu i le Salamo 37: “¹⁴Ua fese'i ae e tagata amio leaga a latou pelu, ua lolo'u a latou aufana, ia oti ai e ua puapuagaina ma e matitiva, ina ia fasioti i e ua sa'o a latou amio. ¹⁵E oo a latou pelu i o latou lava fatu, e gauia foi a latou aufana.”

O se faalavelave na tupu e molimauina ai, emuamua mamao i luma le Atua: “³O ia na te lavea'iina oe i le mailei...⁴E ufiufi ifo o ia ia te oe i ona apaa..e faia lona faamaoni māu talipupuni ma mea e puipuiina ai oe..¹¹Auā e poloa'i atu ia i ana agelu ia te oe, e tausi ia te oe i ou ala uma..¹⁴Ona ua naunau mai o ia ia te a'u, o le mea lea ou te faaoaina ai o ia; ou te faamamalu ia te ia ona ua iloa e ia lo'u igoa.” (Sala.91).

Atonu po ua e ui mai ai i le auala lea, ma molimauina ai pe na faapefea ona oo atu se lavea'i mo oe i se taimi ma se tulaga sa leai sou faamoemoe. Ae o lena le alofa leoleo o le Atua. Na te silafia mamao i luma tulaga faigata ma puapuaga e lamatia ai le soifua o ona tagata faatuatua ma ona tagata amio atua. E le o se laki lou sao mai ai, pe ona ua pau lava, a o le vavega o Lona alofa.

O LE FAAMAONI, O LE MANUMALO LEA

“²³Ua lelei ia, le auauna lelei e ma le faamaoni, ua e faamaoni i nai mea iti, ou te tofia oe e pule i mea e tele; ina ulufale mai ia i le fiafia o lou Alii.” (Mata.25:23)

E finagalo le Atua ina ia ‘faamanuiaina’ (**successful**) i tatou i lenei olaga. “⁸E le te'a i lou gutu le tusi o lenei tulafono...ona manuia ai lea ia te oe o lou ala, ona e manuia ai lea.” (Iosua 1). Na amata mai Tavita i se olaga maulalo faa leoleo mamoe, ae na faaeaina ma faia o ia e le Atua ma tupu o Israelu; na faamanuiaina Tavita. O la le perofeta o Samuelu, “¹⁴Sa faautauta foi Tavita i lana amio uma; sa ia te ia foi o le Alii.” (Samu.18).

Ae ese le faauigaina e le Atua o le ‘faamanuiaina’ (**successful**), mai le faauigaina e le lalolagi. Na faamatala e le faipule Amerika o Mark Hatfield le la'ua asiasiga i Kalakata ma le tina ia Mother Theresa. Sa la'ua asia le nofoaga o e puapuagatia ua lata ina oti ('House of Dying'), o loo tausia ai tamaiti mama'i i o latou toe aso, ma le fale talavai o loo laina ai le faitau selau o tagata matitiva e fia maua ni togafitiga. Na maitau e le alii faipule le tulaga ese faamomoiloto na faatino ai e Mother Theresa ma ana paaga, la latou auaunaga i nai tagata ua tuulafoa'iina ia oti, ma le tele o le

puapuagā latou te fesaga'i i aso taitasi. ‘E faapefea ona outou gafatia le mamafatū o le avega aunoa ma le olopalaina i lalo o lona mamafa?’ o le fesili lea a le faipule. Na tali Mother Theresa, ‘Le faipule pele e, e le'i valaauna a'u ia faamanuiaina (successful), ae na valaauna a'u ia ou faamaoni (faithful).

O nisi o i tatou ua valaauna e galulue i tulaga ma tofi e laulioa, a o nisi e galulue ma le lē amanaia pe lē laulioa foi. O isi e silafia uma e le lalolagi a latou auaunaga, ma latou maua taui, meaalofa ma faamālō, a o le toatele o tatou e lē laulioa faapea. Tatou te faavaivai ai? ‘Aua ne’i faapea. E tusa ma le fua a le Atua, o le faamaoni e faitauina lea o le faamanuiaina (to be faithful is to be successful). E i ai le aso e te tula'i ai i luma o le Atua ma faalogoina Lona fetalai mai i upu nei: “²³Ua lelei ia, le auauna lelei e, ma le faamaoni, ua e faamaoni i nai mea itiiti, ou te tofia oe e pule i mea e tele; ina ulufale mai ia i le fiafia o lou Alii.” (Mata 25).

I le isi foi itu faafeagai, o le le faamaoni, i mea tetele poo mea iti, o le toilalo lava lea. Ma ua uma foi ona taoto fuafuaga a le Alii ma lona malo i le taui o lea ituaiga tagata ma lea ituaiga auaunaga - e toe aveese se mea sa ia te ia, e tulia i fafo i le mea pogisa o i ai le taufaitagiaue ma le livilau o nifo. E taua tele le faamaoni, tainane ina le iloa mai e tagata lona faatinoga.

FAAILOGA 40 TAUSAGA EFKS TULAELE, FALEATA

O le susuga Toeaina Faauuga Mata'utia FT, o le faafeagaiga o le EFKS Tulaele i Faleata, na ta'ita'i le sauniga faapitoa e faiologa ai le 40 tausaga talu ona faatuina lenei Ekalesia. O le Tusi Paia na faiatuina e le susuga Keresoma Seuala ANA, o le Tatalo Faafetai o Letupu Mata'utia FS, Faatoesega o Tu'igamala Opetaia Liu AF, Manaoga o Sauileone Tanoi FNA, ma le Lauga na saunia e le susuga Iosefa Afutiti FS. Na muamua molimau se tasi o Tina matua na i ai i le faavaeina o le galuega, Tulelei Maposua Sale, ona saunoa lea o le Toeaina i le tala ototo o le amataga mai o le Ekalesia, ina ua a'e se tofa i e na nonofa i lea laueelele: (i) ia faatuina se Aulotu e tapuai ma tautua ai i le Atua (ii) ia maopoopo, potopoto mafuta faatasi ma nonofa fealofani i latou e o mai i aiga ma itu eseese o le atunu (iii) mo latou alo, fanau ma tupulaga fai a'e ia ola i le finagalo o le Atua. O le Aso Sa, 29 Iuni 1980 na fono ai aiga e 7 e tusa o lea faamoemoe: (i) Seiuli Hansel & Emele (ii) Leiataua Talouli Afutiti & Anoai(iii) Mele Poasa (sui o Poasa Te'o FT & Falesou) (iv) Sam Kaleopa & Pasefika (v) Oane Niinii & Penu (vi) Seve Iosa & Samanai (vii) Maposua Sale & Tulelei.

O le Aso Sa na sosoo ai, 6 Iulai 1980 na faavae ai le lotu, e ala i le ulua'i sauniga na ta'ita'i e Mila Sapolu FT le toeaina o le Pulega ma le failautusi susuga Iupeli Poloie FS na lauga. O le maota o le susuga Leiataua Afutiti AF na faia ai lea sauniga, ma sauniga lotu uma seia oo i le Aso Sa, 18 Iulai 1981. O le ulua'i sauniga lotu lenei sa faaopoopo mai ai isi aiga e to'a 7: Aliimau Isaia, Moevao, Faapusa & Matagi Matautia, Leilua Sefo & Fainuulasi, Malama Iati, Tapua'i Titi, Olo Leaga, maua ai le 14 aiga na amataina le Ekalesia. O toe upu a le Toeaina Sapolu i lea sauniga, *'Tulaele fou e, o luga lava o le La'o'ai nei, na faalataina ai le Alii; ia se isi o outou nei ona faalataina le lotu. Aisea? Aua na fetalai le Alii, 'E sili i lea tagata pe ana le fanau mai.'* O le Aso Sa na sosoo ai na faaopoopo ai foi le isi 10 aiga, ma isi Aso Sa mulimuli ane sa faaopoopo pea se aiga e tasi pe lua. O aiga o loo tautua ma tautiga i le galuega i le taimi nei, e mafuli i e na mulimuli mai, ona e toe 10 aiga na latou amataina o loo i ai nei.

O le tausiga o le galuega - sa muamua auaua'i le Pulega, a o Aokuso 1980 na tausia ai e Poasa Te'o FT ina ua malolo mai le galuega. O Setema 1983 na faamavae ai le susuga Poasa ua gasegase, ae tausai ai e Leiataua Afutiti AF seia oo i le aso 3 Ianuari 1985 na osi ai le feagaiga ma le susuga Faauuga Matautia FT ma Maima. O le mataupu i le fanua mo le galuega, le faafitauli tele na feagai ma le Ekalesia. O le fanua #1: 1/4 eka Magele Ate na mafai ona faamatuu mai ina ua talosaga i le Fono Tele, (taitaifono Hon. Tofilau Eti Alesana) ma fesuia'i ai ma le 1 eka a le EFKS i Malololelei. Na fausia ai le uluai malumalu i le aso 13 Mati 1981 ae faapaia i le 1982. Fanua #2: 1/4 eka a Iosefa Leiataatimu FS o Matafele-fou, e \$7,000 na faatau foi i le tupe mai le Fono Tele. Na fai le loan NPF \$20,000 fai ai le galuega Fale o le Faifeau. Fanua #3: E amata le galuega ae fesili atu Bob Peterson o le tuaoi, pe fia faatau e le Ekalesia lona fanua ma le fale e \$35,000? (*fa'aauau itulau 14*)

EFKS SASINA

(mai le itulau 10)

O nisi o Ofo ua faailoa mai: Aiga o Vaifoia - o Piliki uma o le galuega; Faletui & Tala AF - Vali ma le Pulela'a; Mesala Falelua & Fanau - Faitoato'a Tele; Leasi Vainuupo & Aiga - Apa ma atoina malumalu (\$35,000); Fuiava & Aiga - 8 Ea Malulu; Togai'u Misiki & Aiga - Ma'a (Tiles); Laauli Leauatea & Faletua - Moli Tele, le Faamalama & Nisi Nofoa; Asomua Jacinta Too - Tioata Tele i luma; Lealofi Fale'ata & Aiga - Faitotoa Alumini & Ili; Mafutaga Alo ma Fanau i Apia - Faamalama Tioata; Mafutaga i atunu i fafo - latou te totogiina se Aitalafu o totoe pe a mae'a le galuega. Na ta'ua e le faafeagaiga e \$218,000 le tupe ua i ai e amata ai le galuega. O le inisinia ma le tusiata o Luaipou Titi, o le afioga Matuaofaiva o To'ala Faamanū.

Na saunoa le sui faipule o le itumalo, afioga Laauli Leuatea Polataivao e faafetai ma faamalosi'au i le Ekalesia ma le afioaga a o aga atu i le galuega. Na ia faafetaia foi le faifeau ma le Ekalesia i le tapuaiga a o feagai o ia ma nisi mataupu ogaoga o upu fai o malo. O le afioga Taitaifono Fono Tele susuga Tunumoso S. Iosia FT na saunoa i le Lauga o lea sauniga na faavae i upu a le aposetolo, *"Ia outou tumau ma le le faagaeetia..e le se mea faaleaoga lo outou tautiga.."* Na ia faafetaia le Faafeagaiga ma le Ekalesia i le soifua faatuatua e faia ai mea sili, ma faamalosi'au i le galuega fa'aauau pea. Ona ia folafola lea la te saunia ma Susana le Laulau fou o le La'o'ai o le Faamanatuga mo le Malumalu a fausia nei, e pine faamau ai lona faato'a auai i lea ituaiga sauniga.

FONO KMTA I LUGA O UPEGA TAFAILAGI

O se tasi o taeao fou mo le EFKS le aso 29 Iulai 2020 ina ua fono le KMTA e fa'aaoga ai mo le ulua'i taimi, o fesootaiga ma auala faatekonolosi (ZOOM). O lenei fono sa auai uma sui e to'a 9 o le Komiti KMTA i Samoa, aofia ai le Laulau a Fono, le afioga Taitafono Tavita Anesone FT (Faleata), le susuga Failautusi Iosefa Uilelea FT (Lotofaga Lepa Aleipata), Leaso Tupa'i FT (Faasaleleaga), Amuia Seuala FT (Itu o Tane), Ailepata Leuta FT (Aana), Fili Matalavea FT (Malua), Siolo Tauati FT (Apia), Asotasi Gu Time FT (Apia Sasa'e), Tunumoso S. Iosia FT (Falealili Safata Siumu).

I lea lava taimi ma le nofoaga, sa mafai ona usufono ma auai mai sui o le Komiti mai Matagaluega i fafo, i ala-ata saunia faapitoa, ma latou fono faatasi ai. O i latou sa mafai ona auai mai Niu Sila: Pouniu Faamausili FT (Aukilani); mai Ausetalia: Aviti Etuale FT (Vitoria), Taeipo Malifa FT (Niusauelese), Simeona Taefu FT (Niusauelese Sisifo), Tauaaga Mataafa FT (Kuiniselani Saute). O sui sa le mafai ona auai mai ona o mafuaaga le ma'alofia: Tumama Vili FT (Niu Sila Saute), Silo'a Lologa FT (Manukau), Lauie Lupematasila FT (Kuiniselani), Makerusa Porotesano FT (Amerika), Iosefa Tui FT (Hawaii). Na ta'ua e le susuga Failautusi KMTA le agaga fiafia ma faafetai o tamā o le Ekalesia, ona o lenei auala o fesoota'iga ma fonotaga

faaonaponei ua mafai ai ona usufono ma auai mai i latou i atunuu i fafo. Sa molimauina le sologa lelei ma le manuia o le fonotaga i le fa'aaogaina o lenei auala, ua talafeagai lona mana'omia i nei aso o le faigata o femalagaiga ona o puipuiga o le faama'i Koviti-19. E i ai nisi itu e fia teuteu ma faalelei atili o lenei auaunaga, auā ua mautinoa nei o le a saga fa'aaogā pea ma mana'omia tele e le Ekalesia, mo fonotaga a le nofo a Komiti, Faalapotopotoga ma Sosaiete, o itutino eseese o le Ekalesia e oo lava i lana Fono Tele pe a talafeagai ai.

O le Ofisa o Faamatalaga ma Fesooota'iga Faa-tekonolosi (Information Technology) Tavita Une Passi sa nafa ma le tapenaga o lenei auaunaga fou, ina ua faatagaina ma tatala mai le avanoa e le Failautusi Aoao o le Ekalesia. Sa amata i le tulaga faata'ita'i (trial basis), peitai o lenei ua maua le laisene o le EFKS e fa'aaoga ai le ZOOM , e oo atu i le 100 sui e mafai ona fa'aaogaina i lona tau tusa ma le \$500 i le masina. E i ai le talitonuga e ui ina puapuagatia le lalolagi i le faama'i, ae sa natia ai, lea ua faailoa manino, se tasi lenei o faamanuiaga ma meaalofa ua tatou maua mai le Atua, mo le faatinoga o tiute ma feau tau lona malo. E maualuga foi le faamoemoe o le a sili ona aoga lenei metotia ma auala, mo le faasalalauina atu o le Tala Lelei e ala i tapuaiga ma le Upu folafola.

40 EFKS TULAELE

Na talia fiafia lenei avanoa, ma faatau ai i le fesoasoani mai a le Ekalesia Aoao e \$15,000. O le maota lea na taunu mai le susuga Faauuga ma Maima nonofo ai. O Galuega Atia'e: #1 - Uluai Malumalu fausia 13/3/81 faaulufale 23/12/82, \$40,000 le tau. #2 - Maota galuega(Hall) muamua, fausia 11/3/88 umusa 28/4/90, na fetau ma Ofa & Valelia ona toe faalelei lea. #3 - Maota galuega lona lua, fausia 13/4/99 - 18/6/99, \$48,833.49 le tau aofia ai leipa \$10,000. O le galuega sa tula'i malosi mai ai le susuga Galuefa Leilua FS a o failautusi a le Aulotu. #4 - Malumalu fou, Maota Faifeau, Pa le Fanua 23/3/2005 - 16/12/2005, \$567,998.33.

Na tolaulauina le tuufaasolo mai o Laulau a Komiti mai 1980 seia oo mai i le 1999 na nafa ma le aufaigaluega o sui o le Ekalesia. A o le 2000 na fai ai le suiga, e Taitafono tumau le Faafeagaiga, vagana Sui Taitafono, Failautusi, Teutupe e iloilo i tausaga taitasi. Tausaga 2019 na amata ai Komiti o Taulaga Samoa, Nuu Ese, Au Taumafai & Au Leoleo. Oe galulue i tofi o le Ekalesia i le taimi nei: FNA - 1, ANA - 1, Aoao Fesoasoani - 2, Tiakono - 16, Ekalesia/Aulotu - 213.

O lupe na fa'ia mo le galuega a le Atua, na auina atu i Malua mai le Ekalesia Tulaele (toa 10) faapea taulaga soifua a aiga o le Aulotu : Niulala & Loreta Kupa (Tafua), Solomona (maliu) & Sieni Afutiti (sa galulue Luua Faga), Elama & Taeario Fulutusi (New Castle NZ), Faasalafa & Siline Alaovae (Matatufu), Iosefa & Tina Afutiti (Peteleema-fou), Nukulaelae & Tuasivi Iati (Samusu), Okesaita & Sulamai Iosia (Easter Creek NSW), (faauma itulau 15)

O E UA FAI'ILAGI LE FOLAUGA

SAMOA MAUTOATASI SALEUPOLU

(11/09/1938 - 11/17/2020)

O le tamā matua ia Samoa Mautoatasi Saleupolu na soifua mai i le aso 11/09/1938 ae na faamānava e le Atua ana feau i le soifuaga nei i le aso 11/07/2020 ina ua 82 ona tausaga. O ona toe sauniga sa faia lava i Vailele, o le afioaga ma le ekalesia ua loa ona tautua ma galulue ai, i le aso 16/07/2020. O Samoa Mautoatasi Saleupolu o se tasi o TIAKONO MATUA a le pulega a Vaimauga i Sisifo, Matagaluega APIA SASA'E.

O le filifiliga a le Ekalesia i Vailele 2011 na failoa mai ai e le tamā ia SAMOA e fai ma sui o le la aiga e fia ofoina atu o la soifua se'i matou galulue i Vailele auā sa tele tausaga sa la TAUTUA FAAMAONI ai i le ekalesia i Fagalii. Ma sa faapena ona amata ai le matou mafutaga ma Samoa ma Aolelagi ma matou galulue faatasi ma le aulotu i Vailele

O le faaeaina ma le faasuafaina ai o ia i le Suafa matai SAMOA, o le faailoga lea o lona soifua e taunapa pea ma osiosi ona aiga ma mafuta i ai. O le vaaiga foi lea o le faatuatuaina o ia i TONU FAI ma le FAAMAOPOOPOINA O LONAAIGA. O SAMOA o se kamuta a'oa'oina lelei, ma sa molimauina le fiafia e fai ana galuega

O lea ua MOLIMAU foi sui o aiga, aemaise o fanau. SA 'AUGA ma faatāua e SAMOA le soifua tautua ma ola auauna mo IESU ma lana EKALESIA. O le tamā e alofa, e onosai ma loto maulalo, e savali i upu na te a'oa'o. E matagofie galuega na te fai. Na te mafaia ona o le AMANAIAINA o FAUTUAGA ma le faasoa mai o tagata. E taua'afia, e onosai e alofa i lana fanau, ona uso ma TUAFAFINE, MAA LATOU FANAU, e agai i ai ma faamaopoopo. E loto fesoasoani i so'o se tagata

Sa fai e Samoa Mautoatasi Saleupolu le faata'ita'iga, e LE faalogologotiga pe solomuli pe a tele le auaunaga mana'omia. Na te le faatigā i se finagalo o se isi tagata, ae taulamua i le faatupu o le filemu ma le nofolelei. **E taua'afia** **male faletua ia Aolelagi Tuisugaletaua Samoa Mautoatasi.** E fai taulaga ma taulamua i faata'ita'iga lelei.

O Upu o le TUSI "Amuia lea auauna, pe a sau lona Alii e maua o ia o loo faapea ona fai" O Samoa e lē o se tagata sa MAOA'E le tamaoaiga, e lē se tagata e mamalu ma taualoa, ae ua lava meaalofa a le Atua sa ia te ia e tautua ma auauna ai i le EKALESIA. Ua uluola le aiga, ma ua manuia i lana tausiga.

O le itula e 11.00 i le taeao, 16 Iulai 2020 sa fai ai ona toe sauniga i Vailele. Sa ta'ita'iina e le susuga Maauga Motu (FS) Afioga ia

Patele Galumalemana sa saunia Talosaga, sa ou molimauina le soifua galue o Samoa Mautoatasi Tauamiti Saleupolu

Faafetai tele Samoa. E faapea atu lau Ekalesia i Vailele, faafetai tele o lau pule lea. TAUTAI A'E MALO LE TAU. Tofaina ia oe le uso, inā alu ia ma le manuia o loo faatali mai lou Matai Sili i le Lagi


Siaosi Salesulu (FS)

EFKS Vailele, APIA SASA'E

40 EFKS TULAELE

Isamaeli & Jonalynn Poasa (Palmerston North NZ), Sauleone & Lipale Tanoi @ Tulaele, Letupu & Helen Matautia (Loimata Apaula), Galuefa & Sara Leilua (Honolulu Hi), Kuatemane & Faleseu Ulutui (Ketesemane-fou NZ), Feata & Lisa Perelini (Lotofagā Safata), Samasoni Kupa @ Onehunga, Lance & Frida Ugapo (Saaga), Keresoma & Tuvalu Seuala @ Matagaluega A'oa'oga Kerisiano, Dr. Taipisia & Vaisola Leilua @ Kolisi Malua, Iakopo & Mary Faasalaina @ Kolisi Maluafou, Leio & Pesio (Metotisi), Peniamina Talouli (maliu). O i latou o i Malua - Emani Tevaga & Naito Kupa, Samuelu Solomona Afutiti, Otele Vaai & Faletua. Sa taualuga le sauniga i le Talisuaga Paia a le Alii, ona lagi lea o le vii o le 40 tausaga na fatu e le susuga Letupu Mata'utia. Malo! Ia manuia lou 40 tausaga.

O LĒ UA FAI I LAGI



**SAMOA MAUTOATASI
SAUAMITI SALEUPOLU**



**MALUMALU EFKS
TULAELE-FOU I LONA 40**



Susuga Faifeau Faiaoga Malua ma sui Mafutaga Tina EFKS Puleia sa feagai ma le tausiga susuga Faiaoga i lea vaiaso, Aso Toonai 1 Aokuso 2020. E tofu Aulotu taitasi o le Matagaluega Faasaleleaga ma le vaiaso eaufafaga ai, mai le taunu atu i le afiafi Aso Faraile se'ia toe foi i le aoauli Aso Toonai.